

## XIX. IGANDEA URTEAN ZEHAR (C)

### Otoitza

Jainko ahalguztidun betierekoa,  
Zuri Aita esateko eskubidea ematen diguzu;  
eraman bere betera gure bihotzetan  
zeure seme-alabatzako espirtua,  
hitzemana zaigun ondarea irits dezagun.  
Zure Seme Jesu Kristo.

I. IRAKURGAIA: Jak 18, 6-9

*Ekintza berarekin, etsaiak zigortu egin zenituen,  
eta gu aintzaz bete, Zuregana deituz.*

Jakindurien liburutik

Aldez aurretik eman zitzaien gure gurasoei  
gau haren berri,  
nolako zinari sinetsi zioten garbi jakinez,  
haien uste ona sendo zedin.  
Zure herria, zintzoen salbamenaren  
eta etsaien hondamenaren zain zegoen.  
Ekintza berarekin, etsaiak zigortu egin zenituen,  
eta gu aintzaz bete, Zuregana deituz.  
Zintzoen seme-alaba jatorrek  
opariak eskaintzen zizkizuten isilka;  
eta elkar adituta,  
lege santu hau ezarri zuten:  
bai zorionean, bai zoritxarrean,  
santuak elkarren lagun izango zirela;  
eta arbasoen abestiak kantatzen hasi ziren.

ERANTZUN SALMOA: Sal 32, 1 eta 12. 18-19. 20 eta 22

R/. **Bai dohatsu,  
Jaunak bere oinorde hautatu duen herria!**

Poztu zaitezte, zintzoak, Jaunagan,  
zuzenak direnei dagokie Hura gorestea.  
Bai dohatsu, Jauna Jainko duen jendea,  
Jaunak bere oinorde hautatu duen herria. R/.

Hara, Jaunaren begiak beldur diotenengana,  
Haren maitasuna itxaroten dutenengana;  
haiek baititu heriotzatik aterako,  
eta gosetea aseko. R/.

Gure bihotza Jaunaren zain dugu,  
lagun eta babes Bera baitugu.  
Betor gugana, Jauna, zure maitasuna,  
Zugan baitugu gure uste ona. R/.

## II. IRAKURGAIA: Heb 11, 1-2. 8-19

*Irakurgai laburragoa egin nahi bada, [ ] kako artean ematen den zatia utz daiteke.*

*Jainkoak eraiki eta antolatutako herria itxaroten zuen.*

Hebertarrei egindako epistolatik

Senideok: Sinesmena, itxaroten dugunaren oinarria da, ikusten ez direnen agerpidea. Sinesmenaren bidez iritsi zuten arbasoek oroimen ona.

Sinesmenaren indarrez bete zuen Abrahamek Jaungoikoaren esana, eta atera zen ondareztat hartu behar zuen lurraldera, nora zihoan jakin gabe. Sinesmenaren indarrez bizi izan zen agindutako lurtean arrotz, erbestean bezala, txabolatan —eta berdin Isaak eta Jakob ere, agintzari beraren oinordeko zirenak—; oinarri sendo gainean ezarritako herria itxaroten zuen, Jaungoikoak eraikia eta antolatua.

Sinesmenaren indarrez hartu zuen Sarak berak ere, adina joan eta gero, haurdun izateko indarra, agintzari egin ziona leialtzat baitzeukan. Horrela, gizon betengandik —horretarako hilik zegoen batengandik, gainera— seme-alaba asko jaio ziren, zeruko izarrak adina eta itsas bazterrean dauden hondar kontaezinak hainbat.

[ Guztiak sinesmenean hil ziren, agindutakorik jaso gabe, baina urrutira ikusi eta agurtuz, eta lur gainean erromes eta arrotz zirela aitortuz; eta honela mintzo zirenek herri baten bila zebiltzala adierazten zuten. Utzi zuten herria izan balute gogoan, bazeukaten hara bihurtzeko egokiera. Baina haiek herri hobe bat bilatzen zuten: zerukoa. Horregatik, Jaungoikoak ez du haien «Jaungoiko» deitua izateko lotsarik, hiri bat prestaturik zeukan eta haientzat.

Sinesmenaren indarrez Abrahamek, aztertua izan zenean, eskaini egin zuen Isaak, bere seme bakarra; eta agintzariak hartu zituenak bere seme bakarra eskaintzen zuen, hari esana bazitzaion ere: «Isaaken bidez izango duzu zeure izeneko ondorengoa». Bazekien, ordea, Abrahamek, Jaungoikoa indartsu dela, hilak ere biztuarazteko; horregatik, berriro bereganatu zuen Isaak, gerokoaren irudi bezala. ]

EBANJELIOA: Lk 12, 32-48

**Aleluia:** Mt 24, 42a. 44

R/. Aleluia.

V/. Zaudete erne,  
uste ez duzuen ordutan etorriko zaizue eta  
Gizonaren Semea. R/.

*Irakurgai laburragoa egin nahi bada, [ ] kako artean ematen diren zatiak utz daitezke.*

*Zuek ere prest egon zaitezte.*

Jesu Kristoren Ebanjelioa San Lukasen liburitik

Aldi hartan, Jesusek honela esan zien bere ikasleei: [ «Ez izan beldurrik, artalde txiki horrek, zuen Aitaren gogoia baita erreinua zuei ematea.

Sal itzazue dituzuen ondasunak, eta eman limosna. Egin itzazue, zahartzen ez diren sakelak, eta ahitzen ez den gordailua zeruetan; han ez baitezake, ez lapurrek ostu, ez sitsek jan. Izan ere, ondasunak dituzuen lekuan, han duzue bihotza. ]

Zaudete erne, gerrikoa gerrian eta krisailuak biztuta; nagusia ezteietatik noiz etorriko, zain dauden morroiak bezala, etorri eta atea jotzen duenerako ireki diezaioten.

Zorionekoak, nagusiak, etortzean, erne aurkitzen dituen mutilak! Egia diotsuet: bere gerrikoa soinean jantzi eta mahaian eseraraziko ditu, eta bera hasiko zaie zerbitzatzen. Zorionekoak, nagusiak horrela aurkitzen dituen morroiak, nahiz gauerdian, nahiz goiz aldean etorri.

«Badakizue: etxe nagusiak baleki, gaueko zein ordutan etorriko den lapurra, ez luke etxea zulatzen utziko. Zuek ere prest egon zaitezte; uste ez duzuen ordutan etorriko baita Gizonaren Semea».

[ Pedrok orduan: «Jauna, guretzat esaten al duzu parabola hau, ala guztientzat?»

Jaunak erantzun: «Nor da etxe zain zintzo eta zentzuduna, nagusiak bere zerbitzarien buru ipiniko duena, behar den ordutan gari neurria eman diezaien? Zorionekoa, nagusiak, etortzean, hori egiten aurkitzen duen morroia! Benetan diotsuet: bere ondasun guztien morroiburu ipiniko du. Baina morroi horrek bere baitan esaten badu: "Berandu dator gure nagusia", eta neskame-morroiak jotzen hasten bada, eta jaten, edaten eta mozkortzen, uste ez duen egunetan eta ez dakien ordutan etorriko zaio nagusia, eta ebaki-ebaki egingo du, gaiztoak merezi bezala.

Nagusiaren nahia jakin bai, baina hura egiteko prest ez dagoen morroiak, edota nagusiak nahi bezala egiten ez duenak, zigorkada asko hartuko du. Nagusiaren nahia ez dakienak, nahiz eta zigorra merezi duten okerrak egin, zigorkada gutxi hartuko du. Askok eman zaionari, asko eskatuko zaio; askoren ardura eman zaionari, gehiago eskatuko zaio». ]

### **Oparigaien gainekoa**

Bihotz onez hartu, Jauna, zeure Elizaren dohain hauek;  
errukiturik, Zeuk eman baitzikiozu eskaintzeko  
eta Zeuk egingo dituzu gure salbameneko sakramentu.  
Jesu Kristo.

### **Jaunartze ondorengoa**

Hartu dugun sakramentuak salba gaitzala, Jauna,  
eta sendo jarri zure egiaren argitan.  
Jesu Kristo.